

Kennsla á vorönn 2013 hófst mánudaginn 7. janúar. Kennslu lauk þriðjudaginn 30. apríl og síðustu próf voru 16. maí. Önninni lýkur svo þegar skólameistari slítur þessari samkomu og þeir 47 nemendur sem nú útskrifast hafa fengið skirteini sín afhent.

Í mars voru nemendur Fjölbrautaskólans 541 talsins en í fyrra voru þeir 530. Fjölgun nemenda frá síðustu vorönn er því 2%. Eldri nemendum fjölgaði mest og eru þeir nú 30% nemenda skólans og hafa sjaldan verið jafnhátt hlutfall nemenda. Sumir þessara nemenda voru í hefðbundnu bóknámi í dagskóla en stór hópur var í því sem við köllum dreifnám. Það felst í því að nemendur eru í fjarnámi en mæta í skólann nokkrum sinnum á önninni, gjarnan á kvöldin og um helgar. Þannig getur fólk sótt skóla en jafnframt stundað vinnu. Dreifnámið hefur einnig gert fólki sem býr utan Akraness mögulegt að ljúka námi þó það sé komið yfir hefðbundinn skólaaldur og sé í fullri vinnu í sinni heimabyggð. Karlar voru í vélvirkjanámi með vinnu eða í helgarnámi í húsasmíði. Hjá konunum var sjúkraliðanámið vinsælt en það hófst síðasta haust. Brottfall hefur verið mjög lítið hjá þessum nemendum, miklu minna en í hefðbundnu fjarnámi. Hluti af þessu fólki hætti í skóla á sínum tíma og flokkast því sem brottfallsnemendur í opinberum skýrslum. Með því að gera fólki kleyft að ljúka réttindanámi hefur skólanum tekist að draga úr svokölluðu brottfalli en umræðu um það ber hæst þegar rætt er um skólamála í samfélaginu þessa dagana.

Á önninni hættu 26 nemendur og til viðbótar skráðu allmargir sig úr áföngum eða voru reknir vegna fjarvista. Þetta þýðir að brottfall á önninni var tæp 7% sem er heldur undir meðallagi. Brottfallið í Fjölbrautaskóla Vesturlands hefur verið fremur lítið miðað við aðra sambærilega skóla. Rétt er að undirstrika að hér er átt við brottfall á þessari önn. Nemendur sem hættu á önninni koma flestir til okkar á næstu önn eða önnum og verða því ekki brottfallsnemendur í opinberum skýrslum þar sem oftast er átt við fólk sem aldrei hefur lokið framhaldsskóla.

Skólinn hefur átt í miklum fjárhagserfiðleikum frá því löngu fyrir hrun og raunar alveg frá því svokallað reiknilíkan var tekið upp. Ástæður eru margar en nefna má að þegar reiknilíkanið var tekið upp fyrir rúmum áratug var kostnaður vegna verknámsins vanreiknaður enda var reiknilíkanið hannað með bóknámsskóla í huga. Þetta bitnaði illa á Fjölbrautaskóla Vesturlands sem ávallt hefur verið með öflugt verknám. Þegar þetta var loks lagað þá voru stofnaðir nýir skólar á Vesturlandi en það varð til þess að nemendum skólans okkar fækkaði. Það leiddi til þess að skólinn varð óhagkvæmari en fékk samt ekki fjárframlög í samræmi við það. Fjárframlög á hvern nemenda í okkar skóla eru lægri en í minni skólum jafnvel þó í þeim sé aðeins bóknám. Rekstur skólans er því afar erfiður en starfsfólkið er ákveðið í að bjóða áfram upp á fjölbreytt nám, bæði bóklegt og verklegt á meðan við fáum nógu marga nemendur og svo lengi sem skólanum verður ekki lokað vegna fjárhagserfiðleika.

----

Hjördís Árnadóttir námsráðgjafi og Kristín L. Kötterheinrich þýskukennari fóru í barneignaleyfi í febrúar. Linda Hængsdóttir var ráðin til að kenna þýsku. Guðný Rún Sigurðardóttir fjármálastjóri var ráðin fjármálastjóri Kvennaskólans í Reykjavík. Guðrún Lind Gísladóttir var í febrúar ráðin fjármálastjóri í stað hennar. Rúna Björk Gísladóttir fór í leyfi frá skrifstofu skólans í lok apríl. Auður Finnbogadóttir var ráðin í afleysingar á skrifstofu og í mötuneyti kennara.

Menntamálaráðherra skipaði skólanefnd til fjögurra ára frá 30. apríl. Aðalmenn án tilnefningar eru Dagbjört Guðmundsdóttir, Reynir Þór Eyvindsson og Thelma Hrund Sigurbjörnsdóttir. Aðalmenn tilnefndir af fulltrúaráði eru Helena Guttormsdóttir og Hjördís Hjartadóttir.

----

Stóriðjuskóli Norðuráls á Grundartanga útskrifaði nemendur í fyrsta sinn nú í vor. Kennarar við Fjölbrautaskóla Vesturlands hafa séð um hluta kennslunnar þar í samstarfi við Norðurál og Símenntunarmiðstöð Vesturlands. Því samstarfi verður haldið áfram næsta haust.

Þetta er annað árið sem við bjóðum uppá braut sem við köllum almenna námsbraut - tækninám, skammstafað AT. Þetta er sameinað nám í málmíðnum og tréiðnum á fyrsta námsári nemendanna. Við erum að tilraunkenna þessa braut í samstarfi við fleiri skóla. Þetta hefur gengið vel og mun gera

skólastarfið hagkvæmara og veita nemendum fjölbreyttari menntun. Við erum sannfærð um að þessi nýbreytni muni nýtast atvinnulífinu og samfélaginu öllu vel þegar fram líða stundir.

Skólastarfið var með svipuðu sniði og verið hefur á vorönn. Opnir dagar gengu ágætlega nema hvað veðrið setti strik í reikninginn svo fella varð nokkur atriði niður.

Stærðfræðikeppni fyrir grunnskóla var nú haldin í 15. skiptið. Nemendur aðstoðuðu stærðfræðikennara skólans við framkvæmdina. Norðurál greiddi kostnaðinn vegna keppinnar og er fyrirtækinu hér með þakkaður veglegur stuðningur.

Nemendur tíundu bekkja Brekkubæjarskóla, Grundaskóla og Heiðarskóla heimsóttu okkur í febrúar og fengu leiðsögn um skólann í fylgd nemenda fjölbrautaskólans. Kynningin þótti takast vel og eru nemendum okkar sem tóku þátt í þessu færðar þakkir fyrir þeirra framlag.

Í félagslífi nemenda voru þátttaka í Gettu Betur, Morfís og söngkeppni framhaldsskólanna fastir liðir eins og venjulega og 8. mars héldu nemendur velheppnaða árshátíð. Leiklistarklúbbur stóð að uppsetningu á leikritinu Draumurinn. Sýningar voru vel sóttar enda leikritið skemmtilegt og ætlað öllum aldurshópum.

Aðalstjórn nemendafélagsins nú á vorönn skipuðu Valdimar Ingi Brynjarsson formaður. Alexander Egill Guðmundsson, Arnar Freyr Sigurðsson, Elmar Gísli Gíslason, Sólveig Rún Samúelsdóttir og Sævar Berg Sigurðsson.

Ný stjórn nemendafélagsins fyrir næsta skólaár var kosin í apríl. Margrét Helga Isaksen var kjörin formaður félagsins. Með henni í aðalstjórn voru kosin Adda Malín Vilhjálmisdóttir, Bergþóra Ingbórsdóttir, Björn Þór Björnsson og Freyja Kristjana Bjarkadóttir. Sjötti stjórnarmaður verður kjörinn úr hópi nýnema í ágúst. Björn Þór Björnsson og Snorri Kristleifsson voru kosnir stjórnendur Viskuklúbbs, Alexander Aron Guðjónsson, Raket Rósa Þorsteinsdóttir og Sigrún Ágústa Sigurðardóttir voru kosin stjórnendur leiklistarklúbbs. Kristinn Gauti Gunnarsson var kosinn stjórnandi Kvikmyndaklúbbs, Þorri Líndal Guðnason stjórnandi Ljósmyndaklúbbs, Sindri Snær Alfreðsson stjórnandi Tónlistarklúbbs og Adda Malín Vilhjálmisdóttir stjórnandi GEY (Góðgerðafélagsins Eynis).

Skólinn tekur þátt í tveimur Comeniusarverkefnum. Í verkefninu Work made e@sy erum við með 7 öðrum þjóðum og í apríl komu kennarar og nemendur frá samstarfsskólum okkar í heimsókn. Erlendu nemendurnir gistu hjá nemendum úr okkar skóla. Samstarfsskólarnir eru frá Þýskalandi, Frakklandi, Spáni, Ítalíu, Tyrklandi, Litháen og Danmörku. Verkefnið snýst um að gera aðgengilegar upplýsingar fyrir ungt fólk um atvinnu og lífnaðarhætti í mismunandi Evrópulöndum.

Hitt verkefnið heitir Planting our future og fjallar um náttúruvernd, orkunýtingu o.fl. Því verkefni lauk nú á vorönn með því að einn kennari fór ásamt nemanda til Póllands og síðan var lokafundur í Norden í Þýskalandi. Alls tóku 11 skólar í jafnmörgum löndum þátt í því verkefni.

----

Í mars sigraði lið Fjölbrautaskóla Vesturlands í stuttmyndakeppni starfsbrauta framhaldsskólanna. Þessi sigur var árangur góðrar vinnu nemendanna og starfsmanna skólans sem aðstoðuðu þá.

Margt fleira mætti nefna eins og t.d. ýmsa atburði tengda hreyfingu og heilsuefningu en mörg fyrirtæki hér í bæ styrktu það átak í skólanum.

----

Læt ég nú lokið annál vorannar 2013 og óska ykkur sem útskrifist frá skólanum til hamingju með þann áfanga sem þið hafið nú náð um leið og ég hvet ykkur til að halda áfram að afla ykkur menntunar og þroska. Þið megið vera stolt af því að hafa lokið námi við Fjölbrautaskóla Vesturlands og við sem hér störfum erum stolt af ykkur og því sem þið vinnið gott í framtíðinni.

Jens B. Baldursson